





續金陵瑣事卷下

漫士周 暉吉甫著

尋樂宋國儒人 一校

定水李 佺象先校

壬子場事

萬曆四十年壬子科禮部以典試請 聖  
旨未下應天府尹又以典試請 聖旨未  
下至七月二十九日 上命左諭德趙秉



忠洗馬邵景堯主試事八月二十日方入  
簾房考推官知州知縣十四人已住公館  
半月有餘二十二日頭場二十五日二場  
二十八日三場九月初十日揭曉  
本府應試生員二百餘人無一人中式松  
江府張履端張軌端張拱端兄弟三人高  
中堂堂天府反不如張氏一家甚矣文運  
之厄也主試監場提調曾不加意首善之

地何也說者歸罪于開河然歟否乎  
秀才貧者十居八九久住京中未有試期  
歸家取盤費遂悞入場者三百餘人  
好事者編一桂枝香曲以嘲脫科和其韻  
者數人皆不平之鳴

堪輿程夢麟未入場時對鄉先生沈生子  
云府學修方有犯凶星定是脫科沈生子  
笑其術之未必精爲妄言也及揭曉方神



其說

場中原有佳字號以別于他府不知革自何年

隆慶庚午科治中包公在場見填榜至四十餘名本府無名遂言云應天費許多錢糧費許多心力曾不見一人中式府官無光彩此公有才有守越府尹言之故理直詞壯遂得中四人

太祖開科以來南場改易試期者此壬子科不中府學一人者此壬子科

門下晚生

邵公景堯主應天壬子鄉試率一榜舉子到太史焦澹園門每人具一門下晚生帖投謁緣邵洗馬乃焦所取士此翰林故事謂之傳衣鉢

程途萬里



續瑣事  
三  
韓峰沈公越嘉靖乙酉秋八月入試前一  
夕夢人告之曰程途萬里及放榜韓峰中  
矣見榜上第四十四名程途歛縣學生詩  
赴宴時適與程途遇詢其字曰萬里可見  
功名有定數也

定數

韓峰沈公嘉靖乙酉與句曲許蓋齋彥忠  
同讀書夜間議定七題同榻而宿每五鼓  
將盡卽起拈筆作至茶時稿完韓峰卽往  
寺中授徒日日如是凡題無不同者獨能  
盡其性四句蓋齋不欲作而作自誠明一  
節場中出盡其性四句韓峰中式蓋齋不  
第至辛卯始中二人同赴會試及揭曉時  
韓峰夢人將桂花一大枝投懷中蓋齋卽  
以衣袂承之及驚醒猶聞桂香而報者至  
門矣蓋齋復不第至甲辰韓峰監試而蓋



齋始中豈非有定數耶

軟員領

許石城公中嘉靖乙未會元會魁薛方山戲云石城不過是件軟員領若無我硬襯擺撐駕不起石城卽答云君之硬襯擺若無軟員領遮蓋難見大人君子二公可謂善戲

進士未官

中進士未授官者陶元素

舉人未官

舉人官至尚書者陳公恭一人而已其未沾一命者甚多姑自正嘉以來余所知者紀之黃炎杲金瀚金大車張含薛盤沈九思柳旦王肖徵殷序金昺李鎮徐煜張士德皮光國賈明道焦周王庭鑰

貢士



由貢中舉者有矣中進士有矣獨顧隣初  
之會元朱蘭嶠之狀元足與貢士吐氣

中順天鄉試

中順天鄉試者蔣敷田斌蔣敵顧言沈皓  
倪岳倪阜孫義沈庠吳理黃炎杲謝芳強  
毅江鎮李時彥

復姓爲俞彥

中外省鄉試

中外省鄉試者張祥山東田蕙山西金達

浙江許子偉廣東張志淳張含張合雲南  
向翼楊荷春貴州在外省中者甚多不能  
盡記

交趾中鄉試

交趾人中鄉試者陳芹

回回中鄉會試

回回中會試者金賢中鄉試者金大車歲  
貢者馬應龍范一清張銳



父子尚書

倪文僖倪文毅父子尚書

父子御史

趙雪岩趙鷺洲父子御史

父子傳臚

古峰余公光嘉靖壬辰三甲第一人幼峰

余公子孟麟萬曆甲戌一甲第二人父子傳

臚

父子解元

張公志淳成化癸卯張公合嘉靖壬午父

子中雲南解元

父子進士

吳公璘吳公大有倪公謙倪公岳倪公阜

王公徽王公韋金公澤金公達李公昊李

公熙金公紳金公麒壽張公志淳張公合

王公鑾王公可大金公章金公清趙公俊



趙公允余公光余公孟麟何公汝健何公  
湛之何公淳之湛之子棟如顧公國輔顧  
公起元顧公起鳳皆父子進士

兄弟進士

翟公瑄翟公瑛倪公岳倪公阜陳公鎬陳  
公欽金公冕金公章鄭公濂鄭公河何公  
湛之何公淳之顧公起元顧公起鳳皆兄  
弟進士若顧公璘顧公璫乃從兄弟也又

若徐公鳳翔余公大成實親兄弟大成因  
出繼外祖余幼峰家遂爲表兄弟矣

兄弟同榜

兄弟同榜陳鎬陳欽同成化丙午鄉試丁  
未會試徐九經徐九疇同正德癸酉鄉榜  
何湛之何淳之同萬曆丙子鄉榜又若江  
銳中應天正德丙子榜江鎮中順天正德  
丙子榜亦可謂之同榜也又若殷康殷序



同中嘉靖辛酉榜乃堂兄弟耳

兩世同榜

焦澹園吳韞庵董少漁同中嘉靖甲子榜  
澹園之子焦周韞庵之子吳汝璟少漁之  
子董天胤又同中萬曆癸卯鄉榜兩世同  
榜

三狀元子同榜

萬曆癸卯科張陽和子張汝懋沈少林子

沈有則焦澹園子焦周三狀元子一榜同  
中大是奇事

兩世秋元

方山金大車中嘉靖乙酉鄉試有贈兩世  
秋元一扁者王子新戲曰好對一場春夢  
三掌戶部

梁端肅公材初爲戶部尚書丁憂歸再起  
再致仕降本部右侍郎三復原官加太子



少保

三任提學

與愧謝公少南以侍御督學畿輔以憲僉督學粵西以憲副督學秦中門懸一扁云三簡文宗乃文待詔徵明八分書

江南二絕

林屋蔡九達云金子有之文詞王子新之字畫乃江南二絕

九日聯句

嘉靖乙卯中秋姚元白張宴中林堂邀南海吳而待雲間張玄超姑蘇吳子克周公瑕里中金在衡陳子野金大輿盛仲交爲翫月之讌及九日元白再宴馬而雨大作因爲聯句詩諸君擲管而思夜半甫畢盛仲交獨宿齋中人作一小傳以紀之

奸黨榜



正德二年逆瑾矯勅戒諭百官勒罷公卿  
臺諫數十人又指內外忠賢爲奸黨矯旨  
榜朝堂南道御史李熙在榜中上元人

柿蟹相犯

楊希夔有聲文場偶食蟹又食一柿遂腹  
痛泄瀉老醫云二物相犯不可並食後三  
日乃死食蟹者不可不知

不浴溫泉

吳運嘉遊寧夏過臨潼邑從城外訪溫泉  
院卽唐明皇所營楊貴妃浴池也因口占  
一絕云驪山宮殿勢參差何物楊妃洗浴  
池千古醜聲流不盡到來何忍溷於斯遂  
不浴而出孰謂吳人不癡乎

處偷兒太過

一富家夜捉得偷兒乃隣人也因剪去其  
髮墨塗其面紙塞其口褫其衣服縛兩手



于臂縱之去偷兒用脚敲家門門開父兄  
以爲鬼共朴殺之偷兒固可恨處之亦太  
過矣

新婦處偷兒

丹陽王集號華南談其族姪名誠者流寓  
南京高橋門外性不飲酒聞糟亦醉因娶  
婦強吞合巹酒三盃不覺沈醉連衣熟睡  
新婦獨坐更深聞有穿穴聲潛至穴邊候

偷兒方入卽捉髮提起其頭以杙子塞其  
咽喉下喚醒其夫舉燭照之夫大驚曰此  
隣人某也已死穴中柰何新婦曰毋驚張  
我自有處乃高大其穴開一衣箱盛却偷  
兒夫婦昇至偷兒門前輕輕擊門三下潛  
歸方聲言失盜云新婦亦女俠哉

門生三解元

尹公繼臯號玉涵講舉業善于啓發嘉靖



戊午科應天解元余毅中廣東解元崔完  
山東解元李學詩三人一年同中皆尹親  
授業者可謂極盛矣乃玉涵僅中鄉榜而  
已惜哉

### 瓦刺輝

瓦刺輝北虜也投降于駙馬梅公有膽力  
有信義永樂三年冬梅入朝讐家都督談  
深指揮趙曦令人擠梅死竹橋下都督許

成發其事 上怒罪深曦二人對曰此  
上命也奈何殺臣 上大怒立命力士持  
金瓜落二人齒斬之瓦刺輝請斬談深仍  
割其手足剖取其腸持祭駙馬祭畢自縊  
死葬于駙馬墳傍

### 詩譏占產

正德年間御史李公好占人產業不三十  
年折毀已爲空地後一御史好強占房屋



續瑣事下  
好事者粘絕句于門云占人產業與兒孫  
不種桑麻種禍根請看李公基上屋至今  
能有幾間存噫此詩嚴于斧鉞矣

慧月天人品

萬曆十四年七月司馬汪伯玉先生在  
焦山延四方僧天界雲松棲霞素庵從  
實瓦棺振軒玉軒主其事者焦山見源  
共二十四衆建水陸無遮道場有一詞

客攜舊院妓徐翩翩拜佛伯玉先生

作慧月天人品

函大士與諸長者子俱結夏水晶精舍仲  
氏示疾方丈室季氏褊袒主陀羅尼門時  
鏡空長者子朝徹長者子空藏長者子叅  
輔大乘而爲上首夏之半適一蓮葉沿江  
下流其上載一天人翩翩而至至則屏花  
鬢而衣縞素上謁門徒皎靈生少廣天與



諸天人等諸天具諸相好嗜諸音樂習諸  
紛華皎靈猥以非夫容觀無咎音樂無所  
御紛華無所濡誠願一躍波流直登彼岸  
竊聞大士契無上道演無上乘用蠲五漏  
之身歸依無漏門徒入白大士如天人言  
大士謂之人也疇昔種諸善根誤墮彼趣  
一變至道則其優爲遂命門徒肅之而入  
于時繞席奉足五體投地白大士如初言

大士正襟而語天人善哉希有諸天樂矣  
若復何求夫樂爲苦因苦則樂果欲度諸  
苦去樂爲先苦樂無常皆非真義苦無所  
苦樂無所樂是則天真脫令汨乎其真則  
天人亦一苦也衆生亦一樂也火馳輪轉  
迭相循環此有生之徽纏大慈之所深憫  
者也希有願超彼趣所謂無礙智者非耶  
爾時天人藝旃檀香爲大士供大士言善



哉希有乃然西域名香胡然而然胡然而  
燼然則疇入燼則疇歸其性本然不涉生  
滅不生不滅何異薪傳性空真臭性臭真  
空名曰旃檀實非旃檀是爲旃檀吾斯無  
受而無不受矣天人乃笥天衣爲大士供  
大士又言善哉希有衣我如是莊嚴珠有  
牟尼宛然在袞握之徑寸同吾袞中希有  
四鉢亦俱此不忘應不滅有亦不增纍纍

夜光珠珠相射凡我仲季若諸長者子徧  
照相同吾攝是衣受無所受此何以故名  
其故也又何以故同具故也爾時天人逡  
巡卻步奉青蓮花樹七寶瓶於是挈瓶而  
進之爲大士供大士拈花微笑嚮天人言  
善哉希有供我優鉢羅花是出九品上池  
其花千葉葉各趺坐一佛法相如如其斯  
爲妙色身卽圓滿報身也其花或出淤泥



皦然不染要其高廣置之大海與大海同  
其斯以爲千百億化身也雖芳馨色澤曲  
暢羣情有目者之所習觀有鼻者之所習  
嗅要以無色而色無臭而臭殆不可得而  
名其斯以爲清淨法身也夫妙色身則無  
盡藏也化身則光明藏也法身則虛空藏  
也揆之正法眼藏得無盡則光明得光明  
則虛空得光明虛空則無盡希有一三身

也三身一希有也爾無供蓮蓮在爾所無  
所無非所是則真如希有勉矣於是天人  
聞斯義已泣下霑襟吾初供師師導吾入  
衆香界及吾再供乃授我如意珠三供禮  
成乃納我蓮花藏卽慈悲父天人師不啻  
也於是稽首座下合掌而說偈言

金粟下生不二尊 以居士身而說法  
超我有情墮樂趣 歸于無上妙菩提



香雲高蓋本來空 貧子故衣珠自在

願攝三身入三藏 默然獨立總持門

願言解脫有漏身 願言頓悟無生忍

願得名號爲佛子 願得常住化人居

大士聞偈讚言善哉希有乃能發如是心

證如是法是用錫爾名號表爾辯才義不

重宣第爲之偈 皎靈無所著 普照有

餘師 字爾曰慧月 號爾曰幼慈 天

人聞是偈已引身而退造陀羅尼門歷方

丈室謁諸長者子白是義于是魚龍徧踊

瓦礫同宣四衆歡喜奉行與淨名等

注司馬作此品門下士遂錄而梓之送

板于徐姬家時丹陽姜公在禮書旣愛

其文又惜其文從徐姬家取板毀之更

寄書司馬勸其用世不可作無益文章

司馬曰若起官須得七千金方可何處



覓此七千金耶

焦山道場畢雲松老衲過余草堂日莫  
謂無鬼神道場圓滿放燈江中燈忽逆  
流二三百盞聚于寺前江風不能吹江  
波不能遏非鬼神之力烏能然哉老衲  
之言定爾不虛

青樓行

嘉靖末年舊院妓陳彩鸞與江監生情狎

意迷老鴛欲絕其往來兩人遂同縊死焉  
有人作青樓行以傷之云青樓女兒心獨  
苦艷粧日日從歌舞妾身已作路傍花博  
得黃金娛老姆自嗟薄命相耽誤此百衷  
情向誰訴初時猶自帶嬌羞可憐習慣應  
如故相知誰不貴白頭妾身一似水東流  
纔爲故人談舊恨又對新知歌別愁江郎  
顧我良不賤妾意君情兩相戀千金用盡



妾自知老婦顧欲唾君面君雖憐我難久  
留我欲從君不自由何似當初不相識今  
日恩多成怨讐此時此際饒多恨柔腸折  
盡無一寸綠珠不是負恩人區區生死何  
足論生則同衾死同穴悲莫悲于生離別  
香消玉毀自有時琵琶彈罷聲淒切情牽  
意牽惟一線木石心腸終不變前身後身  
知是誰但教世世爲姻眷君不見玉環比  
妾更無緣不聞開元天子同白練

書低

友人談戲語譏秀才云一秀才賃僧房讀  
書惟專遊玩而已忽未午歸房呼童取書  
童持文選視之曰低持漢書視之曰低又  
持史記視之曰低主僧大詫曰此三書熟  
其一足稱飽學俱云低者何也試窺之乃  
取書作枕耳



范字頭

嘉靖丙午科郭公朴孫公陞主試填榜至  
一百三十三名乃范一清府尹蔣公急止  
之曰且勿寫然已寫草頭矣對主試云范  
一清文優行劣不可更中兩主試云老先  
生請薦一人府尹曰去一人薦一人是爲  
私意將備卷中取一卷可也及檢備卷中  
乃得蔣山遂填之先寫范字頭若待蔣者

可見功名有一定之數鄉評推蔣爲君子  
人云

不宜賤售

上元姚三老貲甲閭右嘗買別墅其中有  
池亭假山皆太湖怪石一日狂客王大痴  
來游酌池上酒酣大痴曰翁費直幾何曰  
費千金大痴曰二十年前老夫曾觴味於  
此主人告我費且萬金翁何得之易耶三



老曰我謀之久矣其孫子無可奈何只得  
賤售大痴曰翁當效刻石平泉垂戒子孫  
異時無可奈何不宜賤售

### 七人代筆

浙江永豐縣監生徐某家十萬之富萬曆  
丁酉科入北場鄉試全玄州焦澹園二公  
主試徐買七人代筆每人作文一篇房考  
取爲首卷全公亦已選中及澹園閱之乃

批云七篇清濁長短不同如出七人之手  
遂爾不中永豐人服焦閱文眼力通神云

### 沈氏三殆

雲浦盛時泰字仲交高才博學有聲文場  
旣屢失意將老矣居常仰屋而嘆孺人沈  
氏聞之則曰君見里中得意人乎不過治  
第舍買膏腴榮耀閭里爾以妾觀之蓋有  
三殆焉屈志徇人一也踰憲黷貨二也生



子不肖之心三也孰與君家居著書之爲  
高乎君且欲富貴卽孝廉亦可圖不則從  
君隱處山中何不可者又免三殆之憂顧  
獨奈何長嘆哉盛君笑應曰爾能是吾今  
可爲大城山樵矣

通腸接骨草

萬曆戊寅十月童良玉老年得關格症醫  
藥不効殊無起色偶道人過門索食其子

秀才名廷對者食以糕更請乃買糕飽之  
頃曰汝家何事奔皇乃爾語之故且延視  
之道人曰勿慮而翁今日可不死矣令人  
從我去道人寓三山門外小茅庵中廷對  
親詣其處見其囊中止藥草一束悉以付  
之曰此通腸接骨草也四月發芽百日枯  
多生於觀音山早向陽晚受陰狀似益母  
梗方而凹綠葉如芸生採得汁一盞便活



一人此則去年所收乾者可將若干放砂  
確中用一大盂水煎服歸如法治以進父  
服三碗果神効及走謝已行矣此草尚有  
半又轉以活上河一徐姓者考本草無所  
謂通腸接骨草也

盒子會詞

石田沈啟南云南京舊院有色業俱優者  
或二十三十姓結爲手帕姊妹每上節以

春槩巧具殺核相賽名盒子會凡得奇品  
爲勝輸者罰酒酌勝者中有所私亦來挾  
金助會厭厭夜飲彌月而止席間設燈張  
樂各出其技能賦此以識京城樂事也詩  
云平樂宵燈鬧如沸燈火烘春笑聲內盒  
奩來往鬪芳鄰手帕綢繆通姊妹東家西  
家百絡盛粧殺釘核春滿槩豹胎間挾驚  
冰挽烏攬分攬擲玉生不論多同較奇有



品裏輸無例陪酒呈絲逞竹會心歡袞鈔  
禪金走情友闕堂一月自春風酒香人語  
百花中一般桃李三千戶亦有愁人隔院  
住

聽箏

教坊李節箏歌何元朗品爲第一人盛仲  
交有元朗席上聽箏詩云酒清香藹夜擱  
箏弦上涼生六月冰但許風流擅南館不

教飛夢繞西陵文休承和之云泠泠寒玉  
瀉秦箏片片清聲似斷冰一曲渾疑李憑  
在不知秋旅是金陵張玄超和之云披帷  
月底理鳴箏哀調澄於鏡裏冰試使楚王  
聞一曲可憐應不數安陵黃聖生和之云  
月照高堂彈玉箏泠泠飛峽瀉寒冰羈人  
一聽陽春曲不畏秋風客秣陵周公瑕和  
之云字吐圓珠灑玉箏分明絃索響清冰



漢庭此日誰承寵聞道延年壓五陵何元  
朗和之云汨汨寒泉瀉玉箏泠泠標格映  
清冰愁中爲鼓秋風曲不負移家住秣陵  
穿紅靴

嘉靖乙卯科秀才周易夢穿紅靴皆不能  
測其吉凶及中三十七名名在榜紙接縫  
處有紅印印之印角在易字上宛如紅靴  
然

### 妬婦針腸

一吏部無子妻極妬妾方坐蓐乃盤腸生  
妻暗將針刺于腸上妾生子覺腸有時刺  
痛難忍收生婆私告于妾妾與吏部言之  
諸醫束手訪于一全真曰我能治之用磁  
石大塊從痛處引之引至于臍針從臍中  
出妾竟無恙黃鰥南公談

### 千戶論文



千戶姚福論文云六經而下左丘明傳春秋千萬世文章實祖于此司馬子長爲史記力量過之在漢爲文中之雄韓子深醇正大在唐爲文中之王歐陽公淵永和平在宋爲文中之宗班孟堅祥贍柳柳州精覈曾南豐竣潔王臨川簡淡蘇長公痛快

對語擇壻

尚書吳交石公有二女長女已擇周公金

吳公見金公清童年器宇不凡與夫人言之夫人出一對試之云汗血名駒起足已存千里志金卽對云員吭仙鶴擡頭便徹九臯聲夫人喜甚以次女許焉周官至尚書金官至叅政

虎銜三刀

交石吳公初任節推部民有女初嫁夕被殺于帳中及壻入方覺竟不知爲誰告之



于官波及四十餘人鞠之莫得沈思屢日  
禱之觀音大士夜夢有虎銜三刀跳一舟  
上公覺謂虎加三刀成彪字舟者周也殺  
人者其周彪乎一詢立服

### 乳母墓誌銘

東坡先生乳母任氏墓誌銘嘉靖末年方  
出于地中黃州太守因搨之者甚衆恐損  
其石遂收入庫吾鄉一老儒云此片石一  
生行的是墓庫運可謂雅談

### 雞食黑驢

一鄉先生子好鬪促織聞三牌樓有一促  
織鬪必擅場遂往求之其人云若能以所  
騎黑驢相易方可不願銀也因愛之甚乃  
曰古人尚以妾換馬何惜一驢乎相易歸  
家方持盆而玩忽跳于地被雞食之乃頓  
足大怒曰一匹黑驢被雞食之可恨可恨



聞者莫不大笑

### 穀漿報

秀才王逢堯號健庵乃南原公之族姪家甚貧十六歲便與人寫金軸皆取穀樹漿以帖金積五十餘年忽手背皮裂開寸許流膿一二日卽長完遂遍四肢皆然宛如穀樹之刀痕對人曰生平過取穀樹漿此其報乎

### 毛海泉

郭次甫曾遊大勞山拜趙寶山爲師寶山引見一仙長毛海泉毛自言金陵人元末入山後余每會全真自大勞來者卽問之與次甫之言合悉云遍身綠毛目光如電

### 象棋

象棋國手忻傑苗輔二人王鳳洲公在刑部時門下有端姓瞽目者招牌云下棋無



續瑣事下  
敵手算命有神通有客薦忻傑與較勝負  
鳳洲公出銀五錢爲采相約曰能兩局勝  
者得銀忻卽連勝兩局坐客躡忻足忻悟  
第三盤佯爲和局

一曲顏回

桐庵周紀一曲顏回兩京馳名 武宗南  
狩曾詔令鼓琴萬兩溪有文紀之

梁上黑氣

許謙甫生一子七歲極聰慧又無疾病五  
月五日領兒閒步親見中梁一團黑氣落  
兒頭上兒大叫一聲昏倒於地次日遂死

棄官知變

江寧縣尹金公傑蘭谿人嘉靖戊午任好  
談神仙知天文一日觀天象不悅題詩縣  
堂結句云江寧事業待賢官遂封印棄官  
去至庚申秋振武營兵變遂殺黃侍郎



評李杜

蟄南黃公評李杜詩云太白五七言絕句甚佳少陵則甚拙少陵五七言律沈着跌宕壁立萬仞太白則遠不及太白鳳凰臺一首外鮮見其匹太白飄逸中每失之率易少陵沈鬱中每失之蹇滯太白長篇多起韻少陵長篇多寡句

生死兩夢

敬庵金公冕官南刑部廣東司郎中時妾周氏懷孕夢一金盃紅袍神人入其臥室遂生一男卽石莊公也及石莊公罷官歸周夫人復夢前金盃紅袍神持弓射石莊公一箭而去次日石莊公拜巡按歸適秋溟殷公來訪賓主方談石莊吐血一口死於椅上異哉生死兩夢也

熱石



隆慶乙巳秋日余同宋宗周國儒溧水韋  
操句容許佐高淳邢邦翰醲錢沽酒夜登  
雨花臺賞月俱席地坐韋覺一石炙手遂  
取歸次日將冷水一盂投石浸之水溫而  
石之熱不減雨花臺出熱石前此未聞

旗裹紗帽

嘉靖三十二年大司馬張公經同府廠看  
城將至三山門風吹大旗將公紗帽裹落  
於地公大怒亦無可奈何而已後公以事  
下獄此蓋先兆

四翅紗帽

皇親指揮葛川後戰白溝河有功 成祖  
特旨令紗帽上加兩翅以寵異之竟不叙  
功指揮今住孝陵衛余曾遊靈谷寺過其  
家瞻其像方知有四翅紗帽之事

詩集



前輩工詩不甚畱稿有稿而未刻與刻  
而湮沒者頗多據余曾涉獵一過者載  
之

張閣老益字士謙號春庵文僖公集

倪尚書謙字克讓號靜存文僖公集

倪尚書岳字舜咨號清溪文毅公集

童尚書軒字士昂枕肱集

劉尚書麟字元瑞號南垣清惠公集

王尚書敞字漢英號竹堂王氏家乘

周尚書金字子庚上谷稿漁陽稿

顧尚書璘字華玉東橋全集

景司業暘字伯時前溪集

余祭酒孟麟字伯祥號幼峰余學士集

焦太史竝字弱侯號澹園澹園先生全集

澹園先生續集

朱太史之蕃字元介號蘭岵奉使朝鮮集



南還雜著落花詩

顧太史起元字太初號隣初寒松齋稿歸鴻館稿武陵稿

許太常穀字仲貽號石城二臺稿外臺稿武林稿省中稿歸田稿

陳太僕沂字魯望號石亭遂初齋集拘虛館集

王太僕韋字欽佩南原集

黃驗封甲字首卿號蟄南鳳巖山房全集李郎中逢暘字維明翰峰遺稿

司馬御史泰字爾瞻號西虹山居百詠

余御史光字晦之古峰集

何御史淳之號太吳足園稿

謝布政少南字應午號與槐河垣稿謫台稿粵臺稿

王叅議徽字尚文號辣齋引笑集



陳副使欽字亮之自庵稿

顧副使瓌字英玉號橫涇寒松齋稿

李副使熙字師文號飲虹尚友集飲虹遺

稿

張副使鐸字世鳴號秋渠詩一卷

胡副使汝嘉字懋禮號秋宇沁南稿

何叅議汝健字體乾號龍崖竹素園遺稿

何叅議湛之字公露號矩所疏園稿歸田

稿

伊僉事乘字德載詩一卷

沈僉事琮字廷器休齋稿

陳僉事鳳字羽伯號玉泉清華堂擇存

宋僉事存德字惟一號育齋鴻雪稿

姚太守黼休齋集

姚太守汝循字叙卿號鳳麓錦石齋集

羅太守鳳字子文簡齋家藏集十卷抄本



王太守可大字元簡號少冶白雲稿

鄭太守宣化字行義號獅南成趣園稿

王太守堯封字爾祝號華岡學惠齋稿

韓太守國藩字价卿號襄宇涉園稿千首

律詩

卜長史鏜字子振號虹泉三華館稿

何司理棟如字子克號天玉攝園稿

殷同知康字汝錫雲樓稿

陳京兆時伸字元晉號月身子看和

史京兆謹字公謹詩一卷

高知州遠字近思號致庵飲虹稿抄本

梅明府純字一之損齋集

陳明府芹號橫厓子野集

周明府元號勾餘長卿集

李明府登字舜庸冶城真寓稿

倪明府民悅字公甫江上編



管檢校景字子山西浦稿抄本

向知州黌字序伯二淮稿

李經歷曉字子晦號鶴山賓柳亭稿抄本

顧教授言詩兩卷

丁訓導璽字伯符希山吟

羅主簿燾字元博淵泉集

金訓導丹字赤侯詩一卷

舉人金大車號方山子有集

楊貢士希淳字道南虛游遺稿

盛貢士時泰字仲交游吳雜紀游燕雜紀

大城山全集四十卷

太學王元貞號肖淮孟起集

太學黃祖儒字叔初號諫鳳嚙覺稿

太學孫起都字幼如意在亭詩

方時俊字求仲歛縣人卜居金陵五噫草

秀才金大輿字子坤子坤集

以下皆秀才



盛敏耕字伯年號壺軒軒居集

崔士元拘虛集偶然集

黃戍儒競辰齋稿

黃復儒字叔遜振秀閣稿

方登字舜庸半蒼軒稿

宋夢驄育齋子詩一卷

李佺字象先竹浪齋稿遂園稿

葛如龍號玄湖雲蒸集

姚履旋字允吉湖海紀游

孫謀字燕貽號五城長嘯集

先名標  
課餘稿

臨淮侯李言恭字惟寅號秀巖青蓮閣稿

貝葉齋稿游燕稿

李宗城字汝藩惟寅子汝藩稿

陳指揮良弼詩二卷

陳指揮鐸字大聲號秋碧雪香亭稿秋碧

軒稿



湯參將胤勛字公讓東谷集

張指揮維字管文號淇澳青藜閣稿

王指揮元坤字德載雅娛閣稿

齊王孫慶榭號小碧籜冠稿

徐諒號居雲中山王裔居雲稿

徐邦寧字仲謐號嗣軒中山王孫習靜齋

稿

山人馬俊字惟秀詩一卷藏于家未樂時人以下

皆山人

蔣主忠詩一卷

蔣主孝詩一卷

賀確字存誠友菊詩

史忠字廷直金琮字元玉江南二隱稿盛

仲交所編

金銀竹溪集

謝承舉子象集



徐霖號九峰子仁集清游稿

許鏜號攝泉隱君集

王臣字希臯北山詩

杜大成字允修晞真集

吳擴字子克長吟閣稿

景霽字光父登涉紀吟避暑吟

顧源字清父號寶幢玉露堂稿

張正蒙字子明蓬蒿集

金鑾字在衡徙倚軒稿

胡宗仁字彭舉知載齋稿

馬電字元赤入蜀稿

柳應芳廣陵人卜居金陵陳父稿

程漢字孺文歙縣人卜居金陵塘上雜詩

吳運嘉字叔嘉姑蘇人卜居金陵水雲堂

全稿

陳玄胤字叔嗣霞舉集荳花園草



盧氏號恒齋倪文毅公夫人有詩一卷在  
文毅公集中

馬氏號芷居陳石亭公夫人詩十四篇芷  
居集

周潔字玉如張羽王妾雲巢集余有抄本

舊院妓馬守貞號湘蘭馬姬詩

舊院妓朱無瑕繡佛齋稿

僧來復字見心蒲室集

僧守仁號一初夢觀集

元澣號樸隱樸園集

大同字一雲號別峰天柱稿

梵琦小字曇耀有北游鳳山西齋三集

宗泐字季潭全室集

溥洽號南洲雨軒集

覺澄號古溪雨華集

慈露號心田雲隱集



續瑣事下  
四  
慶文香林集

唯實唯庵集

清遠渭禪師有外集

弘恩字三懷雪浪集

寬悅號臞鶴堯山草

欽義號湛懷焚餘草蚶餘草

德清號憇山夢遊集

如愚號蘊璞飲河稿石頭庵稿

法通號從實談品餘籤

太守姚鳳麓選金陵諸公詩未成焦朱

二太史欲選未暇今載此集各以爲他

日採擇者張本耳

詩評

藝苑卮言評我朝之詩金陵有七人焉孫  
伯融如新就銜馬步驟未熟時見輕快湯  
公讓如淮陰少年斗健作噉人狀王欽佩



續瑣事下  
如小女兒帶花學作軟麗顧華玉如春原  
盡花芭藤不少劉元瑞如閩人強作齊語  
語多不辨張愈光如拙匠琢山骨斧鑿宛  
然又如束銅錮腹滿中外道陳羽伯如東  
市倡慕青樓價微傳粉澤強工顰笑鳳洲  
公此評不識當乎否歟

有量

魏國公徐六岳午日飲河亭觀競渡突有  
秀才乘醉入坐索飲且大罵忽嘔吐滿几  
案間卧地且罵且睡六岳撤去飲食令數  
僕守之云相公醒來口渴奉之茶洗面奉  
之水索食奉之點心不可有違乃歸府秀  
才醒來問何緣在此徐僕云云秀才慚愧  
掩面而去六岳可謂有能容之量而善處  
矣

回回戴孝



回回有喪戴白布帽衣白布服腰束一白布凡送殯者卽官與秀才皆然安遠侯柳公心葵掌後府時適有國母之喪見一回回不從中國之服痛責之云汝一家有喪白帽可也今乃國母之喪尚從夷俗分明是不服王化矣人多快之

### 把總

宦一方者當知一方之稱呼南京土俗稱醫人爲郎中非六部之郎中稱櫛工爲侍詔非翰林之待詔稱工人爲把總非軍營之把總一少卿怒一染工旣痛責之又波及兩三人必求軍營之把總以加罪幸得一給諫解之不然破主人之家矣

### 蔣山戴帽

鍾山一名蔣山龍蟠之勢隔城可見凡黑雲罩山頭天必有雨俗謂之蔣山戴帽刑



部廣東司一主事某在太平門裏頭條巷  
住皂役有名蔣山者偶衆役俱集獨少蔣  
山主事急命看蔣山一人誤聽看字擡頭  
一望曰蔣山戴帽主事又誤以爲戲已大  
怒痛責及辯明刑已上身矣

### 火蛆

嘉靖年間三坊巷吳璉開大葷店生意茂  
盛大鍋晝夜火不停焰鍋底忽生一泡乞  
食老全真云此鍋旺氣方熾其泡不可重  
後燒火者慮其費柴鏟去之中有火蛆長  
二寸許從此生意遂消滅矣

### 水銀變蜈蚣

王有翼文恪公孫流寓南京曾飲徐錦衣  
少東之宅夜歸見地湧出水銀用手舐少  
許盛于拜盒內次日啟盒視之變爲兩頭  
蜈蚣何其變之迥異乎



柴少

陳泰華名時億有向火之癖友人譏其不可偏向熱邊去須冷竈裏也着一把熱竈裏也着一把方好泰華答云奈我柴少僅堪熱竈用聞者皆笑

還金逢杜裕

淨泉顧公澄字淵父家世饒於貲弱冠爲弟子員言論侃侃重信義有友勞君自東

粵南遊曾以重貲托公而歸歸更數年來取視其笥封識宛然勞君每對余幼峰宋育齋稱其輕財抗義又無錫太學周君以千金寄公處周君死人無知者呼其家人還之生平不負人宜乎人不負公也有杜裕者領公資本爲生殖計久之盡爲乾沒自燕京歸封鎖一桶昇至云此一千五百金遲數日來開盡鐵石也反自不認公由



此方食貧有子九德中隆慶丁卯鄉榜杜  
死獄中天之報應不爽如此

### 二狐化妓

馴象門屠戶陳元嘉靖初年半夜將渡江  
買猪月中見兩犬前行忽如人立乃是兩  
狐向劉公廟破棺中取兩髑髏加于頂拜  
月卽變爲老幼兩妓陳驚駭不敢聲言遂  
上江船少頃二妓亦來同渡到浦口賃酒  
店接客半年後陳乘醉向彼索盤費二妓  
不認陳曰你姓胡某處同渡江今改頭換  
面便忘我耶二妓赧然倒囊與之後陳再  
尋之已不知其跡矣

### 疇草

石岡王公家在馴象門裏地旣荒僻路徑  
多草公掌都察院時南道御史撥余丁四  
名與之疇草公急遣之曰此四人非親戚



續瑣事下  
定是鄰里也何忍用之其厚德如此

辭世偈

李務成字兼之李懋彬次子性至孝好禮佛十三歲爲舉子業時有雋語二十而病與僧覺圓同習靜期年而愈謂覺圓曰吾兩人所學者爲形骸計耳性命之學不在是從此專意西方之教壬寅九月忽歸家告母曰兒前身是僧因修未徹墮落到此

兒於此月廿三日竟往西方矣母聞之大驚泣臨期復強之寫數字曰見字如見兒也遂援筆作書別母趺坐而化其辭世偈云有滅還非滅無生卽是生生生滅滅滅生生一燈常照琉璃瓶

渡江誓神

味淡何公遵正德甲戌進士丁丑奉命往督荆南稅務蒞荆初卽申嚴禁令首竄



奸胥數人一時輿論翕然稱快舊弊有丈  
尺畸零樣木熟抽諸名色悉徵課入官備  
用積歲不下數千金坐不潔者卒以此公  
悉革去凡徵課遇小商貲百金以下者視  
常額量減十分之三或罹風水耗折幾半  
者雖大商必盡蠲焉戊寅事竣歸行李蕭  
然登舟波浪大起公投一詩與江神云兩  
袖清風歸去好滿船明月順流安此心若  
與神明恃一任長江有急湍少頃風浪為  
之頓息

兩頭陀前知

頭陀劉五長大白晢聲音北人也有仙術  
嘉隆間來京往來只在城之西北不過東  
南數日不食面無饑色冰雪滿地破衣赤  
脚殊無寒態人以美食供之取灰土雜之  
而食誠意伯劉石圃夫人病乳嵒甚危偶



問能治否取紙筆畫一石一木吹氣一口  
命縛于額上卽愈夫人依其言夜間頭痛  
發熱遍身出汗乳癩膿矣具酒飯謝之不  
食而去土街口百戶毛俊好延方士請頭  
佗飯飯竟腰間取一繩要借其宅縊死毛  
懇求之乃笑曰你不與我死數年後定有  
一道人死于此遂走大倉後縊死死之日  
有見其渡江者有見之于揚州者蓋尸解  
云至萬曆初年頭佗閻希言過毛百戶家  
飯畢沐浴跌坐而化劉五已先知之矣杜  
汝謙問閻長生訣閻曰汝是橫死漢安望  
長生二十年後杜無故自投水死兩頭佗  
能前知如此

八功德水

靈谷寺八功德水一清二冷三香四柔五  
甘六淨七不噎八除病此水之源在鍾山



隔牆流出于寺今寺有池無水不知是阻  
抑之他流乎或源已絕乎皆不可知

南唐孫忌碑

大學士胡公廣冬至後六日扈從獵龍山  
同蹇尚書金諭德游牛首山佛窟寺詩云  
曉從鑿輿出九關偶尋牛首共躋攀南  
唐古寺留碑在西蜀高僧度錫還百尺巖  
龕過鳥上半空鐘鼓隔人間暫游已覺塵

緣寂到此方知佛窟間 紺宇參差倚翠  
微草深蘿徑客來稀行逢佳境還同到坐  
愜幽期却忘歸掃石只因題別偈看雲頓  
已悟清機山僧莫道渾無事自對寒松補  
納衣註云寺有南唐孫忌撰碑尚存余因  
胡公之詩遍尋之山中無此碑

蟹腹小龜

閩人開質肆姚某嗜蟹兼兩三人之食一



日食蟹見蟹腹有錢大一小龜其興爲之  
頓減

權星

七修類稿云  
我朝權星不明

欽天監楊公伯恒云北斗七星第四星名  
權星此星光淡主天下官無權

地道

建文帝削髮乘馬自朝陽門出又云其出  
由地道有殷秀家居大明門左殷言地道

處曾裂縫一條渠童時嬉戲以線繫銅錢  
垂下探之其深一丈餘

建文遺事

奇才

升庵楊先生與陳玉泉書云盛仲交亦奇  
才此評豈易得乎

妖氣

方嶠住杏花村有竹一林甚茂 武宗南  
狩時冬日取行根筭賣與將官可得利三



續瑣事下  
五  
倍夜夢祖宗分付勿過取筭云次日鋤得一堽開堽黑氣冲人隨至其家啓閉其門戶顛倒其器用損壞其衣裳使舉家不寧偶遇一全真云君心志惑亂面染妖氣幸而尚可制方卽拜求之全真書三符入門焚一符急擊令牌再焚一符卽拘妖氣入堽中嗚嗚然有聲又以一符封堽口埋于西北地其妖遂絕

標營

萬曆丙午年妖人劉天緒以小術惑衆自稱李王謀爲不軌約十一月二十二日冬至乘文武官謁陵欲一網打盡以舉事幸賴太祖在天之靈妖黨陳學首之於守備朱公大司馬孫公黃昏聞變卽密差把總王表等半夜而擒二十餘人皆其魁也不動聲色消京城之大變其功不小矣



孫公因奏請建標營與兵部相近選精兵一千四百人家丁一百二十人其裁定營之規模選擇兵之強壯皆專委王表焉營建而陣未布忽有營兵劉文舉自陳關聖夢中授以陣法依其言布之簡易而奇非神謀不能也或問不叙孫公之功而又去其官何也蓋孫乃蛟門所取士蛟門去矣孫焉能獨留

### 不取甕金

南濠都公穆字玄敬任南京兵部主政司武庫啓土得兩甕千餘金衆以爲天賚意其所必得都諭衆曰吾聞非其有而取之者殃必及身與其得金而致禍何如棄金而就安哉旣疏奏有旨隨置武庫公費從此清譽日隆近年戶部褚君盜取庫金過午門下馬牌落大銀一錠于地從此遂



續瑣事十一  
五  
敗官何其清污懸絕如此

### 火甲

太祖所行火甲良法也每日總甲一名火夫五名沿門輪派富者顧人貧者自役有鑼有鼓有梆有鈴有燈籠火把人執一器人支一更一更三點禁人行五更三點放人行有更鋪可蔽雨雪可拘犯人遇有事則鋪之甲乙燈火相接鑼鼓相聞凡刀鎗

兵器與救火之具一損壞有修鋪家整理獨飛差與人命事種種弊端皆總甲當之甚至數年不結局此最害事所當急急更張者都察院都御史丁公洞察其苦變其法以三等九則徵錢官行顧役總甲火夫何其簡便實成祖北京所行法也但夜間鑼聲一過不復再聞尸聚一處便於抵換此更當一加意也



四無

石林祝公給諫喜接山人目不識丁者亦  
爲上客及考察年有揭石林四無者山人  
也謂無狀不準無書不發無人不見無酒  
不飲此是實事操江耿公叔臺聞之曰尚  
有無扇不寫

厚嫁女

南京風俗不善教子却厚于嫁女且不擇

壻一鄉先生鄒平罷官歸嫁女與顧今庶  
不知其人之痴絕也儘其宦囊以爲粧奩  
費蓋用數千金自嫁女後貧而賣文平江  
伯請寫書數封借今庶紬衣而往一月未  
還今庶遇岳丈于塗奪其衣歸人之厚于  
嫁女者可不鑒乎

談笑坐化

冶城道士張良宿飲酒食肉却有道行一



生無病八十五歲與客對飲談笑坐化何其飄然也意者有所得乎

### 屍鬼

王辣齋公過黃紫芝家主人未出窺見書房內長案上卧一紅衣官及推開其門乃是光案再掩門潛窺所見如前因急呼主人出曰大怪大怪我乃見鬼乎述其事與紫芝同窺宛然紗帽紅員領一官也黃曰此案買未十日細觀之隱隱有人影劈案燒之尚有血痕辣齋曰此案非停屍板定是棺材底耳不然何得有此屍鬼也

### 僧官變蛇

嘉靖丙寅年火焚大報恩寺三尊大佛腹內靈臟恐人盜去取出貯庫皆是金銀重七十五斤盡被僧官住持盜用無存後李九我爲禮部侍郎查出罰僧官真讓造墻



續瑣事下  
四十堵遂完此案真讓死變蛇在靈座下  
托夢與徒弟云蛇是我也日食塔燈油四  
兩久之方不見

看操

嘉靖初年京營坐營張重飲田千戶宅坐  
有俞鑑兄弟與諸太學皆城南富客張云  
不能奉陪夜飲四鼓入營有看操之役俞  
謂我輩可得一寓目乎張卽于坐上具請

帖邀看操次日將散操時諸君方到坐營  
再令演陣走馬飲將臺上跌傷一軍跑死  
一馬把總高鵬舉其事兵部兵科大怒拿  
坐營與俞鑑諸人下獄將以軍法罪之確  
不可解俞用銀數萬兩陞兩兵部一兵科  
推倒營墻二十餘堵只以同衆躋入看操  
問以不應罪革高把總職獨坐營死獄中

僞金銀氣



賣骨董王瓚號玉田談其隣王老有二子  
長子臣妻生次子卿妾生分其產業最勻  
殊無偏向獨住房分與卿者不許賣與他  
人只許賣與兄臣數年後弟欲賣兄臣堅  
執不買及他人講成又不押字弟無可柰  
何心生一計請兄夜飲暗將燒酒數斤潑  
於墻隈用火點之其紫焰似金銀氣兄窺  
之心動遂依分單買之及弟移居向見紫  
焰處啓土得千金皆有臣字果父有前知  
之術乎抑鬼神使之也歟

佛牙

游僧從浙地廢寺塔上盜取佛牙貢于五  
臺陸公陸公遂張大其事邀鄉官姚鳳麓  
諸君命僧官迎之供于天界寺毘盧閣中  
此舉在林下佞佛者則可若大臣行之非  
體也伍觀察林居漫錄謂五臺公以金盒



續理學  
盛佛牙送司禮轉太宰則誣之也甚矣

### 補靴

剛峯海公清苦之行舉朝不能堪亦舉朝不能及曾以破靴一雙發上元縣補完乃是真情非沽名也御史房公寰督學南畿按臨蘇常生員作揖遺下二紙大書此房出賣四字所以刺之其品可知乃忌海公剛正極力醜詆至目爲天下大盜古今劇

賊亦指及補靴事進士彭旦陽顧涇凡諸敬陽不平連名劾寰掃滅公論排擠孤忠乞賜罷黜三臣皆得罪削籍南驕卿沈公繼山疏救三君蒙 旨切責寰復攻海沈二公天下共疾其誇誕無恥竟獲優容

### 金釵陰案

尚書周公瑄曾孫號雲峯者爲人朴實不交遊不飲酒偶隣以金釵托賣蓋借尚書



家聲其物易售也袖釵送隣出門適遇金  
姓銀工以釵示之金以巧言誘釵去卽償  
他債數日周往尋之遇諸途因忿罵則有  
之未曾相打也銀工歸家遂死族有秀才  
名從泰誣告毆死素知其易與暗約秀才  
方樵城講和貼銀及檢驗有重傷蓋被他  
人毆者兵馬痛責送監從泰索之更多樵  
城講之未就周破一磁器刎死于獄此屈  
無從伸于清天白日之下矣後從泰死樵  
城瞽已過十有餘年至壬子歲樵城忽自  
語金釵不關我事者數日不住聲死之夜  
托夢與孫女云爲你家金釵事陰司要結  
此案拘我對理今別你去孫女卽嫁之周  
族人者天明訃音忽至與夢合寃屈事遲  
久必發可畏哉

風流掌教



冲溪彭公輅嘉興人進士嘉靖年間掌教  
府學進諸生語之曰朝廷那得許多官職  
人人皆戴烏紗帽無此理也不如從我做  
詩飲酒又謂杜工部之詩如酒肆中帳簿  
不可學其風流議論如此

清湖談公世講沔陽人進士萬曆壬子任  
掌教癸丑上元日買燈遍點學中設席明  
倫堂獨據上坐六齋先生傍坐飲酒酒罷  
皆金玉者令六街婦女得入觀燈觀者如  
市亦彭公之流亞也

咒不可發

給事鍾公宇淳惡海剛峯每呼名而罵之  
與督學房公交最密房論海剛峯或咎之  
則曰此鍾掌科慙慙我耳鍾乃發咒神前  
曰我若慙慙房心宇論海剛峯當口上生  
疔死未幾轉少叅歸家竟死于此瘡夫事



既真矣豈可以發咒掩公論欺鬼神乎

### 老嫗解事

田石川遊燕囑其老嫗曰如乏用將厨内古銅鼎向姚秋澗或費晴牕家質銀數兩用石川久不歸老嫗恐鼎塵埋呼婢洗之婢將瓦磨洗去青綠且喜斬新姚云一文不值費云僅可賣銅老嫗浩歎而已

一市兒娶妓褚四爲妾死後寫旌云明故處士某公之柩其妻聞處士二字誤爲褚四也大罵司喪者云結髮妻不得書旌上乃娼婦反上旌耶必易之方已

### 私鑄生盜

私錢病國由上之人有以縱之此其故難言也萬曆三十九年九月初二日大京兆陸公因斷生亂被圍于蔣都司家幸而未及于難鴻臚劉公曰陸老先生爲國丁老



先生爲民其言良是今寺廟中銅佛銅神  
鐘磬雲版多盜去以鑄錢旣操國家之利  
權又收盜賊之賤貨其病國病民豈小小  
乎哉

蟻陣相鬪

江寧縣石塘前村國初時有施萬五者極  
富太祖因事抄沒之家遂貧至萬曆年  
有號前溪者善經營忽數百萬蟻四面圍

遶其家列成陣勢而鬪鬪且數日蟻聚之  
多蟻事之奇未有過于此也今施家漸入  
富境矣

拽蓬

淮清橋西有關公廟玉工華春雷素嚴事  
之癸丑冬自揚州回南江行遇逆風舟幾  
覆水已滿艙舟人篙工號泣待斃而已忽  
關神現身雲端大呼拽蓬拽蓬吾救汝一



舟人人無敢從者一淮商奮力起蓬四葉  
頃刻間入港舟賴以無恙華歸至廟扣頭  
數百爲神像粧金以答其貺焉

游魂題詩

湯胤勣爲叅將守邊突與胡戰敗死後數  
月口外某驛天色將暝忽有兵官至騶從  
甚盛坐中堂令免供具第索筆硯燈燭閉  
戶而寢明早驛卒俟其起門戶寂然無人  
但見壁間畱詩未有血污游魂歸不得當  
年空築望鄉臺之句始知爲胤勣云

採萍

大理少卿長興楊公復甚貧家畜一豕日  
命童子玄武湖塢採萍爲食吳思庵訥時  
握都察院章以其密邇廳事拒之楊戲作  
小詩送云太平隄下後湖邊不是君家祖  
上田數點浮萍容不得如何肚裏好撐船



收馬鞭

上元尹程公燾字文純江西南城人嘉靖十六年任能甘清苦催科不擾且聽訟如神考滿囊僅俸銀柒兩餘自騎蹇驢一蒼頭隨之上京有糧長許濟許翽具銀八十兩馬鞭一根先渡江往大柳驛候送程公見銀笑曰好良民怕父母餓死耶將銀歸家訓子孫讀書可也取馬鞭鞭驢而去

來鶴亭

禮書忠銘王公署太常篆校樂觀中方奏樂時忽一鶴飛來且鳴且舞遂馴熟不去因造一來鶴亭作文紀之又索詩于諸詞人何矩所詩云羽衣矯矯掠齋丘蓬翼風搏萬里秋舞向兩階隨振鷺聲諧九奏和鳴球雷門懸鼓聞曾入緱嶺吹笙遲共遊千古儀庭歌盛事一夔今在鳳池頭



感詩迎太子

畜德錄云解學士縉應制題虎顧衆彪圖  
曰虎爲百獸尊誰敢觸其怒惟有父子情  
一步一回顧 文皇素不喜 仁宗感此  
詩甚思時 仁宗畱守南京頗懷憂虞因  
命所親信者莫如夏原吉卽日往迎之可  
謂得諷體矣

止稅疏

南京司禮監少監党公存仁當權稅之使  
布于天下皆同輩也公獨上一疏論其病  
民此其識見過人遠矣

漢鏡詩

人有持水銀古漢鏡售于朱宗伯鏡背有  
隸字詩云照日菱花出臨池滿月生官看  
巾帽慙妾映點粧成此漢人詩也未傳於  
世因載之



狀元能畫

體庵顧元伯云我朝狀元能畫者惟朱蘭  
嶠一人

許闌

東治陳公時萬將會試夢隨許石城公行  
許跳過一欄干已亦跳過欄干許會元也  
自料科名可以相繼及不中選涇川知縣  
前令名許闌巡按至甚貪墨命縣中選裁  
縫二十名用意在綾羅也陳清官不喻其  
旨僅以裁縫送入皆不用乃以許闌數事  
去其官夢之驗如此

七篇夢成

正德庚午年王石岡公自正月至七月非  
病卽訟未常一日治舉業取得名入試不  
望中也在場看畢七題卽熟睡到下午軍  
搖醒勸令作文公曰夢中七篇已成僅少



結尾兩三語耳援筆寫出是科中式

秦清

周祭家甚貧與秦清結伴賣雜貨拮据勤苦十餘年兩人皆有七八百金周知秦孤身遂謀死盡獲其財人無知者久之白日見鬼自驚自怪自問自答皆秦索命索銀之語乃縊不死延僧道禳解之稍安靜又夜間睡時有大蛇盤于胸將頭

對其面無可奈何而死意者蛇卽秦清乎

燕子魚

市上見燕子魚與燕無異不敢買食問之老漁曰每八月或網得之不能多得其味甚美

臺頂無草

九日飲雨花臺上客問臺頂何以無草余謂從古如斯宋詩人劉後村咏雨花臺有



續事  
句云一片山無草敢生此可證也

內守備考監生對

南京內守備太監廠例有監生歷事遇大  
比亦是本監考取送名得入場嘉靖初某  
公不深書義曰不必考文但出一對佳者  
送入對云子路乘肥馬諸生俯首匿笑一  
生云堯舜其病諸謂騎猪也公不解曰好  
送去聞者絕倒稱爲才子後果中解元李

惟寅太保談

耳談

八種傳奇

陳所聞工樂府濠上齋樂府外尚有八種  
傳奇獅吼長生青梅威鳳同昇飛魚彩舟  
種玉今書坊汪廷訥皆刻爲已作余憐陳  
之苦心特爲拈出

詩話

焦澹園先生中萬曆己丑狀元閣試和韓



昌黎石鼓歌云周原石鼓奇且閎幾年踪  
跡沈蓬萊世遙幾得睹拓本殘章斷碣如  
瓊瑰何人輦載踰千里至今照耀黃金臺  
河傾崑崙勢曲折雪壓秦華高崔巍蔡邕  
嵇康那足數石經奔走洪都儕回思共和  
歷隋代披荒斲古其誰哉天昏地慘鬼夜  
哭至寶欲出風雲埋韓韋博雅始一識鄭  
向搜索窮山隈四百六字傳青簡二千餘

載開蒼苔龍畫旁分爪蟠互蟲書深刻神  
剪裁求致太學竟不果鳳翔落莫空山崖  
皇明文物邁前古冲融雅頌相沿洄辟雍  
橫陳雜鼎黜黜廟堂貯列參樽罍想見周王  
盛羽獵從臣撰述皆奇才聲詩炳蔚垂日  
月雕鏤宛轉回雲雷之采山泐跡半掃漢  
水鼎沈名已灰豈知籀徃蹟自在摩娑細  
讀如談詠近傳岫嶠碑更偉青字赤石鉅



以魁宣王雄俊神禹智何異鼻祖於雲來  
神物出沒兩不偶昔何揜翳今昭回安得  
移之置一處挈龍披鳳心眼開春風却立  
讀萬過咎繇吉甫親追陪嗚呼咎繇吉甫  
常追陪

狀元亦閣試兩次特不同庶吉士拘拘  
在館中作課耳

朱蘭嶠先生中萬曆乙未狀元閣試玉河

冰泮云暖律初回大地春先覘泉脉動天  
津餘寒漸逐東風解細浪將隨化日勻玉  
蠓漂搖漸影亂金堤漫衍水痕新恩波此  
際通靈沼魚藻千秋頌至仁 天家早歲  
占春陽銀漢新流出建章光映晴雲時蕩  
漾聲和鳴珮共鏗鏘魚龍會見風雷起蘋  
藻行看罨畫張一望粼粼連碧落仙槎疑  
自女牛傍 閣試鴻雁來賓云郊原曠望



入秋深序列南翔見候禽墮影高空隨落  
木蜚聲午夜雜寒砧湘江霜月連玄塞北  
海音書到上林繒繳未須勞弋慕平沙遠  
水寄閒心

祭酒郭公明農乃張心澳司理辰州所取  
士張請郭飲因請陳認所相陪乃郭同年  
又同門者陳觀壁掛郭送心澳入蜀七言  
律詩一聯云吹角風生巴子國鳴鑣春動

錦宮城乃笑曰只有錦官城那有錦宮城  
郭明農你錦官城尚不知乃批點杜詩耶  
時郭有批點杜律刻板國子監也

七夕好事者大集山人儘有好詩七閩鄭  
漢卿有織女通烏鵲之句武林戴青笠誤  
寫鵲爲雀余謂用此雀字乃是新事漢卿  
既說出織女烏鵲私情牽牛吃醋另用一  
番瓦雀耳聞者爲之解頤



石城許公有句云平生愛我無如酒凡事  
輸人不但棊薛方山極口稱之

矩庵陳公鄉邦之麟鳳有矩庵集余求之  
三十年不得偶過吉巖顧司理案頭見矩  
庵詩一卷遂錄五首以寄其景仰之私云  
謁定山 定山今在眼夫子久云亾朝著  
功名薄郎曹鬢髮蒼青天知出處白壁愛  
文章無限停驂意蘋花遶澗香 廣惠寺

感舊 一醉眠僧榻重來三十霜容顏嗟

我改童行過師長未穩江湖夢空驚歲月

忙舊游今有幾雲樹正茫茫 陸良材冬

官席上王伯安秋官泊鎬同懷良弼選部

聯句二首 停雲一賦又三年 鎬為儼手

神白晝眠 王心事偶同池草句 陸詞華應

陋錦江箋北來南去飛蓬似 鎬鷺社鷗盟

野性然形勝金陵傾渴甚 王秋風震翮快



三千 攜手秋風記昔年 王 別來幽夢對

床眠南曹誰和同心曲 鎬 朔鴈虛傳隔歲

箋江外孤航期短泊 王 生平舊約未輕然

聚星擬繼荀陳會 鎬 一醉春瓢豈論千 王

喬白岩希大李舫齋惟正王槐雨敬止過

余寓舍杯酌聯句 燈前一話十年情 鎬

世路紛然憶友生 喬 清露漸零涼透葛 李

散星聊聚彩垂楹 鎬 虛堂坐久妨僧定 喬

遠道將歸問客程 李 吟送寺門雙闕近 鎬

不禁分手月華明 敬止

元末謝宗可金陵人有詠物詩徐茂吾擇

其花影鴈字睡蝶粉竹香塵梅雪松濤麥

浪氷花烟柳燭淚月露荷珠遊絲十四題

詠之吾鄉何矩所朱蘭嶠顧隣初張華宇

韓襄宇陳延之葛雲蒸李象先張彥先孫

燕貽張伯愛胡彭舉陳玄胤皆有和章獨



張彥先僻居牛渚詩名未起余喜其詠花  
影云形消夜雨晴猶在怨入東風老不知  
客有喜陳延之鴈字結語云可惜月明孤  
度影一行不就却徘徊余謂此延之終身  
不遇之讖

後府都督王漢冲鴈字一聯云黑海平過  
疑蘸墨祝融不渡爲焚書人頗稱之

公安袁小修來遊金陵俞羨長邀諸詞人

請小修結社于秦淮小修出一題云月映  
清淮流邀而入社者三十九人同聲遙和  
者三十餘人刻一秦淮社草集中獨無小  
修詩何也佐酒妓朱無瑕傳靈修張似玉  
三人皆有詩皆代筆社中諸作當以不隨  
雲影駛翻共水痕高爲壓卷友人見似璧  
嗟難售如珠惜浪遺之句鼓掌曰好好的  
清淮明月要作璧賣要作珠拾何其有市



心乎

太守張孚之好集句工填詞不甚畱心律  
詩韓价卿云孚之花月二十首甚好乃和  
文衡山者二十首用一百六十花字一百  
六十月字又要拘韻最是難事余喜其句  
云月可羞花非是妬花能閉月足稱妖月  
惹花香誰是主花畱月艷迭爲賓爲月屢  
沾花露濕因花常戀月華濃客來月徑蟠  
花坐酒泛花樽帶月嘗

沈生子喜葛雲蒸鶯聲嬾出村之句此句  
誠佳

吳叔嘉謝蕭大將軍以斬馘見示一聯云  
高擎眉目猶含苦細檢弓刀尚有瘢余謂  
苦字不如怒字叔嘉欣然從之

舊院妓馬月琴能詩善鼓琴吳中陸世明  
訪之口占點絳脣贈之云三尺冰絃夜深



彈破青天竅意中人杳只有清光到雲雨  
無緣總是相思調愁懷抱嫦娥心照訴與  
他知道月琴因求室中春聯陸擲筆書云  
半牕花影人初起一曲桐音月正中月琴  
讚誦不已徐言中字恐不如高字世明欣  
然易之

詩妓齊錦雲亦善琴對人雅談終日不倦  
與庠士傅春眷愛更不他接春受仇事誣  
繫獄錦雲脫簪珥爲餽給甚至售卧褥供  
之後謫戍遠方錦雲欲隨行春恐途中反  
生禍端力止之錦雲因贈一絕云一呷春  
醪萬里情斷腸芳草斷腸鶯願將雙淚啼  
爲雨明日畱君不出城春去遂蓬首垢面  
閉戶閱佛書未幾病沒人多義之  
珠市妓郝昭文小楷法黃庭甚工亦能詩  
有句云願求舉案侶羞學倚門粧從良之



續瑣事下  
心殊切後嫁遼東指揮隣姬泣送嫌其遠  
昭文曰溷于風塵寸步不樂旣得從良再  
遠過遼東亦所甘心

### 杏村園

隣初太史遜園在杏花村中凡村中之園  
皆詩以紀之一經品題頓長格價不但如  
方叔之記名園而已

杏花村方幅一里內山園據其什九雖  
與曠異規小大殊趣皆可游也間與同  
人散步其中稍得勝賞因各爲一詩紀  
之惜不能如李方叔之記名園使人足  
當卧游耳

鳳臺園舊爲魏公別業今屬上瓦官寺  
諸髡次第平其臺芟其樹而稅與灌園  
者名勝盡阨諸髡且自咤爲青銅海矣  
傷心千古鳳皇臺蕭瑟僧寮伴草萊歌扇



舞衣無處覓西風蟬咽不勝哀

張太守孚之佚園舊爲徐公子萬竹園  
張與王太守分其地而有之堂榭具存  
古樹深篁杳然異境今孚之復下世園  
日扁無人過而問焉者矣

萬个琅玕抱石斜朱闌深瑣但棲鴉自從  
仲蔚辭三徑誰爲求羊掃落花

王太守爾祝園卽所分徐氏之一也中  
有高樓古樹頗自蒼然然太守生前足  
跡曾不一至園丁灌藝而已

高臺傑閣倚崔巍疊石疏花面面開爲問  
輞川文杏館幾從裴迪賦詩來

西園舊爲徐公子業水木最爲森秀窈  
窕惜堂宇鉅麗差損山澤間儀沈生子  
大令舊嘗居之汪上舍景純易以千金  
歲久不治蕪池過半汪坳又將易主矣



中有古栝及石皆宋時物也實爲諸園  
之冠云

西園坦迤接華林窈窕經丘樹色深朱戶  
晝扃唯鳥雀不知誰抱薜蘿心

吳孝廉孔璋園園爲齊王孫業吳以善  
價得之地故倚城隅多竹與桂望之陰  
森蔽天日今竹已枯矣吳君意欲新之  
成可並美西園者

城陰竹色勝梁園六十年來筍不繁聞道  
幼輿丘壑在不妨移石動雲根

何參知公露園西北枕鳳皇臺亭館池  
樹參差多致舊爲哈氏所創屢易主矣  
後爲方士醒神子館參知得之小爲拓  
潤與遯園東西相望也

琪花璫樹近堪攀海上求仙去不還獨賸  
文成馬肝石參差疊作大何山



續瑣事  
卜太學味齋園在花麓岡西枕上瓦官  
寺地既高曠有樓三楹面東而峙遍覽  
城內外最爲登眺勝處俯視西園如接  
几案矣

嵯峨飛棟入烟空俯視皇州一氣中誰向  
賞心誇絕景已專丘壑大江東

許典客長卿園坐驍騎倉西北爲九天  
祠有堂有閣有亭有軒翼然具體內繡  
毳花絕大而茂可與鳳臺西紫薇競秀  
它所未有也

玄度閒情問薜蘿徵花選石倚娑娑名園  
不淺春華色總讓中庭玉樹多

李象先茂才園在古瓦官寺南余遯園  
之右面東門有長榆數株清陰夾巷舊  
爲賓伯隣書屋僅老梅數株耳象先擴  
而潤之幽邃有佳趣



瓦官寺南高樹陰中有幽人橫素琴曲房  
小徑殢還徃夜靜獨聞鐘磬音

許長卿新園在張氏佚園之北亦萬竹  
園地也長卿購之爲起亭館夷曠可數  
百丈花木秀野長卿恒與客嘯咏其中  
半畝方塘看戲魚豈棚瓜架日蕭疎高齋  
把酒聽黃鳥恰是江南四月初

許無射園在蕭公廟東入門曲房宛折

至迷出入轉入廟後地忽宏敞頗以竹  
樹綴之

人間玉斧自仙才隱洞深依古殿開宛轉  
曲房何處入直疑瑤館祕天台

湯太守熙臺園在杏花村口地不甚廣  
而多佳樹亭子外老杏數株花時紅霞  
映地矣

杏花村外酒旗斜墻裏春深樹樹花莫向



碧雲天末望樓東一抹綴紅霞

陸文學園在許典客園南有池種荷菱  
小亭踞其上花架綺錯望之斐然

一點妖紅泛綠波曲池芳樹影婆娑  
靜引南薰坐自按江南子夜歌

方太學子中園在村東城下古屋數間  
中有牡丹致佳舊入門皆修竹今不復  
茂矣土垣版扉人不知其中有園也雪

浪和尚曾寓此中余過之謂可辟世

修竹晴看綠雪飛古牆深巷隱雙扉不須  
更說喧難避苔徑由來屐齒稀

張係御園在許無射園北舊爲王太學  
館係御得之中有屋三楹清寂可人亦  
多佳樹友人沈不疑常稱之

曾從沈約問郊居此地仍堪賦遂初苦竹  
自深人不到可能重駐子猷車



續瑣事  
隣人李氏小園在湯園之東兩塘相連  
彎環清泚堤上垂楊大可合抱杏花斜  
拂水面老幹鐵立亦可賞也

小池微亞綠楊低黃鳥春晴不住啼何處  
一樽堪引醉小橋斜日杏花西

武文學園在下瓦官東雙扉常扃聞多  
花竹錯以山石未及游其藩第從鳳臺  
西見杏樹繁盛異常爲之延眺而已

咫尺桃源未問津隔墻紅樹擁殘春自嗤  
尚淺王郎興嘯味還期待主人

二弟羽王園在驍騎倉東南有池可種  
蓮新架高閣延矚東南諸山

欲隱何須更買山卽看高閣迥塵寰誇他  
建業千峯出盡在危欄指顧間

三弟周南園其地名外井修竹數十竿  
小屋數椽而已弟構此未終而坳余每



到此不勝人琴之慟

緣坡修竹影離離小屋捎雲入暝遲莫問  
何家山小大月中清嘯玉參差

四第太復新園在九天祠之北地平曠  
第新構屋宇蒔花竹其規摹大槩如遜  
園而加整飭

自愛山林引興長更憐春草媚池塘行園  
處處皆相似喚作新豐也不妨

遜園居士顧起元紀事

高參將

高公鵬字雲程任陝西掌篆都司嘉靖己  
未春奉勅山西太原左參將公聞報卽  
匹馬長驅抵太原任所則三月念之二日  
也時值按臺遠出參謁往來已經半月及  
回任事則四月十二日矣至四月念四日  
夜三更忽聞門外刀斧之聲已劈開門直



至廳後大叫都臺急請會話公卽大罵黑夜有何話說十數家丁左右圍遶偏公傳令謀反曰此撫臺意也公乃奮然舉刀傷二人衆家丁擁入殺公矣嗚呼痛哉向非公以死挫其鋒則上至親王下及諸司皆被塗害莫能逃者其功豈下於衝鋒破敵舉旗斬級而已哉巡撫葛縉乃嚴分宜至親謀反者巡撫標下家丁孰敢直指其畔

逆之由以申雪公受禍之慘乎巡按御史楊美益疏參巡撫語多曲護不過曰似應量加罰治以責後效而已已死參將高鵬量加優恤而已如此一疏何以明公道何以慰忠魂嗟乎高參將之死輕於鴻毛矣

### 高參將三異

南溟高公鵬母張夫人懷孕十四月聞空中有聲落斗大一團黑氣滾入臥室遂生




公一異也公過北徐州白日見控馬者二  
鬼也抽刀將斫鬼卽遠避收刀復來控馬  
及入海岱門乃不見二異也在河南夜夢  
神人告之曰自處是梅花從新又別家征  
衣猶未做依舊客天涯及赴太原參將任  
過天涯山始悟前夢三異也

刻詩竹上

城北嘉善寺有奇石景最幽重陽日文衡

山許攝泉同逆文題詩竹上云蕭蕭落木  
帶江干翦翦幽花過雨斑豈意旅遊逢九  
日共來把酒看三山後書丁亥九月九日  
徵明同子嘉彥明同子穀來休承卽刻詩  
大竹上好事者取詩竹製筆筒今尚在王  
丹丘家





Small vertical text on the right edge of the page, possibly a page number or a small inscription.

Small vertical text on the right edge of the page, possibly a page number or a small inscription.



